

嘉禾志卷第二十四

碑碣

顯濟廟記

秀州海鹽縣乍浦之陳山有靈湫居山之半水旱不涸不溢山椒有大石盤陀歲三月十有八日吳之陽山及此多雲霧晦冥雷雨之變俗傳爲白龍君以是日生於陽山而歸藏其母於是焉故有祠事甚嚴州邑旱潦致禱必先酌酒石上有物蜿蜒卽見崇甯三年部使者以聞詔以顯濟名其廟宣和五年又以昭蘇旱虐始封龍君爲淵靈侯紹熙元年四月不雨至

禾志二十四

一

於六月睢陽李直養攝華亭邑部使者以才薦畀令事還入境漕河已斷流亟利下俄有蜿蜒舉體金色見神坐上直養迎挹卽循其左臂而上至巾幘因請歸醮祠復循而上如初匳中四龍子如粟闔邑驚奇見所未見閱三日大雨霑洽溝澮畢通苗槁而興誕置蜿蜒及匳子於石頃之俱無所見七月又旱申禱旋應適如其時日是歲進龍君爲廣惠淵靈侯龍母慶善夫人命旣下神報益彰明年三月直養以祠宇敗撓弗稱夫上命旣下神施遂衰眾力爲建二大殿鼎新像設且列四神像於後以表四龍子之異迺

四月龍見於龍母殿自空而下其大如柱光
采奪目觀者震悸不敢仰視五月廟僧夢神人告將
迎龍淮上有日計海邑之雨可支兩旬爾自是開霽
復雨之日果再浹也又明年三月直養遣工繪龍於
壁至則壁尚溼不可爲也念且歸其夕夢金冠白衣
神人曰令俾爾畫龍龍實難畫工曰畫非難壁溼爾
應曰乾矣東作行雨自西而歸仍有珠乃成龍更語
爾令它日謁雨當誦華嚴袖出經一卷顧其後四神
人云此亦爾令所致也工起視壁果已乾如戒而龍
成有蜿蜒 正白復見神座睨視壁閒久之躍而

禾志二十四

二

入於花壺四月郡守趙不迹以梅雨愆期親作文以
禱其應立至六月直養請於郡徙興福院勅廟之右
以廣僧居而嚴香火直養狀如此以屬楚國龔頤正
紀於麗牲之石夫龍之爲神變化無方與天爲徒孰
能測識上古之世爲人豢擾有道之時游其宮沼迨
及後來雖渺焉弗覲而乘雲御氣開閤化樞呼吸風
雷主持暘雨司民大命克配君德有不可誣者今茲
龍君之神應暴著一時聲動觀聽春秋祈報斯民是
怙閱千萬禩宜無攸斃頤正不敢沒其實始彙括比
次如右而系之以迎享送神之詞云

海波淵淪兮海山寵從其下潛通兮君之宮時思其
母兮來春容萑葉生兮杏蒂融君之來兮雷隆隆雨
我田兮秧芄芄我之懷兮無初終君稅駕兮匪陽斯
陳鼓鐘廟享兮列鼎重茵君之宮兮屯雲蕙肴蒸兮
芬芬我黍我稌兮抑亦薦其萍芹君明其衷兮無吐
芳新吹洞簫兮望極浦君之歸兮雲在下十風兮五
雨佑我海邦兮汙萊斥鹵君不來兮使我心苦千秋
萬歲兮爲民所怙

嶽廟記

五嶽各於其方配天作鎮靈粹所宅亦各有攸司或

主人民死生禍福之事或主鬼神山川水土鳥獸草
木之類是於覆戴之間爲最隆最巨者也然自古帝
王告成受代升中紀德之盛必於泰山而四海之民
朝獻祈禱皆不遠萬里不能至者各隨所處建立行
宮以爲請命之地豈非神靈顯赫威德盛大爲生民
宰制尤可畏而仰哉章聖皇帝東封申嚴帝號以彰
洪德允答元功順天休命典冊具存是於今日尤爲
尊崇非諸祠廟所得擬議也或者嘗謂行宮散處遐
僻而有禱輒應如在其上如在其左右其理安在蓋
不知人之精爽沒爲貴神則所謂聖而不可知者未

始或亡寂然而感不動而通其疾俛仰之間再撫四海之外猶風行於空招之則來而風實無體猶日麗於天有照則現而日實不來比陽燧取火方諸取水從容掌握之間引類太清之上患心之不精識之不至爾況以天孫之貴方嶽之尊風馬雲車倏忽萬里杳冥之際肸鬻斯在又何疑之有哉昔人有言心卽神明發意動念猶如影響固其理也海鹽陋在一隅其民謹信而淳樂善而畏神前此歲有朝獻之社間以憚遠莫能至者熙甯中邑人相率始築茲廟迨今三十餘載迺克有成自三門兩廡前後大殿聖母眷

禾志二十四

四

屬凡爲殿五宮曹司典侍從監衛塑像儀物莫不畢備是爲一方尊事瞻嚮植福依歸之境俾善人是賴而愚者不敢爲非實非小補又春秋祭祀咸以佛事薦羞惟素茹不宰牲牢而神亦安之豈非所享在誠而不在物耶故首讚神德備論饗答之理以信斯民於不疑之地於千萬年無敢怠忘是不可以無紀也時大觀四年七月日奉議郎權通判杭州軍州管勾學事陸周記

修嶽廟記

海鹽去岱宗道阻且長里且千計而有嶽帝行祠蓋

經始於熙甯中至大觀四年迺克成將歷百年瓦腐
桷圯至於上雨傍風寢無所蓋障尸之者假修崇爲
私計薄有獲而未嘗略支傾填漏邑大夫李君爲政
纔一年又三數月卽哀衆力葺之殿鉅細有五其一
妥聖母者圯甚而重創其諸及廊廡之屬藩括經夷
榱棟梁桷丹碧黯昧或蠹或折貌像多剝不但晦於
塵垢者莫不赫然一新自昔何其難而今何其易邪
蓋神以民爲主欲致力於神必成民以先之可也不
然雖薦饗亦吐之矧土木之功極勞費神豈樂其若
是而相其成也哉李君自丞遷令時縣家及州家券

禾志二十四

五

外征求悉若子產爭承力丐裁減而寬之夏秋稅租
前改雖有心於仁民者亦迫於板賦預借於民以紓
目前未及省限里長已深苦催科之虐困於捶楚糟
邱鬻醪纔上棧卽強諸胥分受抱輸諸司錢終歲追
索乾沒強半徒費鞭撻此等積弊甚於膏肓之疾不
可救藥乃一切剗去以召和致祥於是雨暘應祈麻
菽麥稻歲存豐稔成斯民若是而後致力於神洋洋
然如在其上者安得不樂歆其薦饗方其啟 揭虔
妥靈之心入其祠致植僵興仆之力卽若有以相之
茲其所以易歟一邦士民有不靳其貲力助葺是宮

者豈皆澹然無欲薦享於神之心覬幸饗答迹其祈禳之願若持豚蹄盃酒祝穰穰滿家者耶夫山嶽淵海之神古唯天子望而祭之諸侯則祭在其境者齊人將有事於泰山必先有事於配林不敢遽也如此季氏旅於泰山宣聖責冉有弗救而有曾謂泰山不如林放之歎不可僭也又如此今士民欲事乎嶽帝而叶力葺其來假來享之宮若有相之者知繇乎令君成民之政有以動之可也或各自謂吾足以享之欲神之格思豈不難哉世之爲不善者薄有薦於神往往不唯覬幸其臯卽渙若冰釋抑又過望乎神降

禾志二十四

六

之福殊不知聰明正直之神執福善禍淫之權公而行之無毫釐私而不可奪移凡不應庇貺者雖豐潔其粢盛肥腍其牲牲者且多其酒醴加之以玉帛三日齋七日戒以祭之猶不可覬其略如風馬之下況希其轉禍爲福乎如欲禍之轉移遷善可也哉詩不云乎自求多福李君以所葺旣新美屬予爲記予辭不獲命乃併欲士民共知之者書之李君名直養其先維揚人大父侍郎紹興閒嘗寓居此邑後徙於茗霄紹興三年五月旣望從政郎新硤州軍事推官張祿記并書

金山順濟廟英烈錢侯碑文

夫聰明正直謂曰神靈膺國褒封饗世血食歷祀不
泯主福主災赫然炳靈人恆斯畏豈偶然哉克孝克
忠爲國犯難生昭直節歿助陰靈者也英烈錢侯所
以身陪正祀封受顯號其以斯乎紀石傳芳示垂奕
世請從具載甯厭纖委西浙諸州禾興最爲邊海華
亭縣小金山者又在郡東插腳滄溟峻岸截起驚濤
四浮吳國備史載漢博陸侯霍公附小黃門謂吳主
曰國之疆土東齧海濤虧蝕侵尋臣漢舊輔今當爲
神駐小金山爲禦海斥使不衝蕩前護國封當爲建

祠於彼金山示所旌顯自時厥後封祀不絕今爲忠
烈王順齊廟焉維英烈侯家閩氏錢行位居七航海
而商舶帆經從入廟致禮儼觀威爽雪浪東來一山
若峙巖巖殿宇卓冠山椒地勢坤靈軒赫斯稱又稔
王忠存漢社稷歆生敬慕若曰浮沈罔利膠轄迷塗
汨渙塵中何終底止歿事忠臣愈浪生死猛念倏發
幽明洞符玉立廡閒叉手睽視不敬不倚窅然化歸
異哉於是驚怪顯迹爲廟部臣老宿相傳幾百年矣
季夏之月廿一日維侯生辰沿海祭祀在在加謹廣
陳鎮金山祠祀尤嚴常歲是日鹽商海估寨伍亭丁

社鼓喧迎香華羅供然前無位號未應國經仗隊弓
刀遙稱太尉殆幾野廟殊闕聲猷屬青齊向化之年
殘金困獸猶競東鄙興師侯能助順虛無之際神證
用彰霧消雲飛陰兵千萬排空而下旌旗著號華亭
錢太尉知識昭明逮及交鋒虜勢披靡風驅電埽冥
助維多主兵上之公朝訪尋允合爰如封敕諡以英
烈庸答靈休端笏垂紳榮被章服從飾仗衛一變魚
雅孟堅母弟孟淳今嗣秀安僖王曾元孫曩居里日
嘗謂堅曰英烈侯神靈國勳如是其偉兄志於文盍
爲紀述其永聲聞當備樂石以奉刻詞茲以書來石

禾志二十四

八

旣就讐紀弗可後乙巳上春甲子熏篆滌毫寓誠歷
敘因作言曰夫所謂聰明正直謂神者豈誣哉忠烈
王功存漢祀雖世祿不嗣於當時而廟食乃存於異
代蓋忠誠勳績迄莫泯忘英烈侯初焉非衣逢掖道
先王者一念向正卽隸明祠惟王與侯胥蠻相應如
斯至者心公忠耳故侯卒能效順佐邦郤殄小醜使
侯居廟堂而職臣事殺身成仁夫豈難能竊祿鄙夫
身縻好爵畏事齷齪當言不斷口若置箝鼠計自營
盼視同列苟利飲啄縮縮循牆鬼蜮斯靡何有何無
若拜侯祠有泚其頰孟堅疇昔之夕矚祀嶽神節仗

旋歸繽紛肅截壁月當午簫吹撼空文繡兒郎粉黛
優豎畫燭椽列夾道東行敬拜奉安一無醉懈顧而
問曰此嬰曰社稷臣也心實歆焉曰有親在無代言
曰人死留名豹死留皮丈夫大節雖死猶生睢陽之
忠常山之操平原叱希烈太尉擊朱泚讀史凜凜恨
九原之不作也神之爲神其以是夫因述侯事遡頌
王忠夙心忠鯁不覺宣露爲之銘曰

正直爲神維忠維孝國有常經祀典崇報博陸在漢
擁昭立宣雖曰世祿不我以延逮及異朝血食廟祀
爲禦隄封叱捍潮水毋使侵齧虧厥疆理至於今世

禾志二十四

九

靈畏若存英烈錢侯起身七閩浮舶而商致禮英靈
惟公與直志合心傾一誠默孚旋隸部下拱立廟廡
杳然冥化東海之濱奉祀畢虔位號封崇若有待然
醜虜不競東鄙興師維侯助順若響之隨神兵千萬
陰雲擁之虜勢旋靡電埽風披昭靈顯功褒號英烈
服爵儀衛一變緜葛我茲銘石匪事夸雄寓勸若人
知孝而忠爲食君祿當勇於事事依違者將焉用彼
致忠於君奮不顧身身死不死其名永存史傳紀錄
廟食薦馨吁嗟鬼蜮狗苟蠅營彝齋趙孟堅記

魯浦亭記

昔史起決漳以溉遂富河內之民鄭莊引渭而漕並肥關中之地故仁人之言也其利溥循吏之愛也其思深令譽焯於無窮豐功流於可久慮事經始豈徒然哉茂苑之東偏禾興之近鄙邑居之盛海鹽在焉先是地非五達之郊物殊一都之會魚鹽攸產聚庸實繁城郭雖存居人無幾墺墦之田弗藝富庶之教未孚民將疇依時思俾乂景德初今參政扶風魯公來涖是邦實縮銅章公琰社稷之器誠謂屈材子游弦歌之聲此焉靜洽一日詢耆舊之說采溝洫之制得白塔古港於縣之西南隅層砂堙積灌叢紛翳翦

禾志二十四

十

爲黽黹之逕寢沮潮汐之池修利闕如因循孔甚公攔然奮發濬復是圖相其方而有初諗其眾而胥悅先庚之令旣下獻力之徒坌集量期令役書以授師曾未越月洪波乃道自海口達邑中凡十有八里而遠其清可以流惡其潤可以蒙福析之可以導其氣瀦之可以鍾其美浸灌之益嘉禾惡種無不猥大也遵涉之利浩商善賈無不駢集也向之編菅把稗之陋販脂賣漿之微率有廣廈之居閒多阜財之積環邑之內變爲豐泰厥後二十年閒公入奉綸恩乃參袞政而負海之甿蒙賴其利蔽棠之野風謠如新遂

指其港謂之魯公浦焉天聖丙寅伍君佑由佐著局
爲縣大夫且嘉其陸社之風愛芍陂之饒衍乘敏政
之暇鳩僦工之材作爲新亭於浦之上因地而名識
其事也觀夫華棖鏤檻麗丹牖之奇茂林修竹蔚澄
凝之趣雖爲造適之所實侑清幹之機將俾夫登豫
章者想孺子之風游魯山者懷紫芝之化斯亦凜凜
庶幾仁智之用心矣落成之始監郡集仙李君照詔
書狀實勾文刊紀勤請之辱敘讓弗遑聊摭梗槩以
附於民謠之末時天聖六年正月日朝奉郎守祕書
丞騎都尉黃鑑撰

叢冢記

吾邑東階鉅海每當風濤暴怒多有溺者之屍乘潮
而上潮退暴露沙際須臾犬烏啄齧以盡遺骸蕩析
隨亦滅沒久矣余聞而哀之昔歲六月人有以所見
言於縣尹者縣尹爲之惻然曰噫人孰無死死而不
幸至於是余職統一邑其獨忍聞此而不爲之所可
乎哉乃亟按官籍得縣治之東北三十六里曰蕩山
置冢塋焉收瘞之浮屠氏師俊實願董斯役遂因山
勢高下夷爲三級廣輪五畝周以垣牆深其竈穴俾
安以固首以其事上屬部常平使者張公且請所爲

塵埋之費期久之不以累縣計張公慨然從之帖
縣之常平庫凡一屍給錢千置曆以稽其付受其它
報發文移號集里伍等事悉据條令以行就命師俊
專司之自經始逮今未朞年凡塵一百四十六人矣
念無以告後來者不可屬余書而刻之石嗟夫仁人
君子之用心隨所寓而見顧今爲邑者往往困於牒
訴之紛委且瘁心於斂積以應大府之追胥爲急務
日力常不給其屬意於斯者幾何人哉然則縣尹之
賢於人遠矣縣尹姓李氏名直養字無害維揚人始
爲丞吾邑用當路薦特改命焉紹熙二年五月旣望

禾志二十四

十二

奉議郎新知建康府江甯縣事陸竣記

秦住山碑

梁天監二年八月二十三日樹今破碎矣
字不知何人作其可攷者有云

前覽灼灼後聖茂哉始皇承天越受帝命業超上古
殲周滅鄭七雄靡餘六國是併功齊太古道深前王
埒炎均昊美冠顓黃通靈七代敬構高堂縱聖凝神
將紀百幾晦藹餘輝飛聲萬祀

右刺史敬素立石其碑不存

唐故陳府君墓誌銘

并敘

府君諱環潁川人也祖興父道清並不求宦達君卽清公之第一子也幼著才識長閑規矩克言理行鄉里所欽何圖天不祐善以會昌二年正月二十一日終於私第享年六十有三以當年八月十六日窆於蘇州海鹽縣東二十八里齊景鄉雅山南二里祖墳南舊塋禮也君娶吳郡顧氏有子三人長曰遂次曰師損三曰公甫並至謙至讓忠乎孝乎泣血主喪絕漿逾制後恐日月久邁陵谷遷移刊石爲誌永傳不朽銘曰

山作田兮田作海萬古存兮誰不改青松新隴曉無年千載唯留銘記在

禾志二十四

十三

義忠佐正匡國功臣故節度左押衙親衛第三都指揮使靜海鎮遏使銀青光祿大夫檢校尚書左僕射御史上柱國朱府君墓誌銘

并

序

謝鶚撰

府君諱行先字蘊之吳郡人也曾祖憑皇不任祖貞皇不仕父敬端皇不仕妣陳留阮氏太夫人揚名立身光於祖宗者惟府君耳府君少親戎律長習武經有摧鋒破敵之堅蘊戡難濟時之策臂猿頷燕宛是將材始隸職於建甯郡從高公彥所在征討累有功

績尋高太傅分符雲渚府君亦隨而於治所入守用
爲心膂或鄰境有寇俾總握兵柄仗劍前驅無不望
風瓦解滅竈之謀投醪之義備盡其妙以是聞於聖
聽疊被寵榮薦厯珥貂累陞八座益爲雲守所重自
渤海公厭世高禮亂行府君奮臂一呼率眾歸國時
天下都元帥吳越國王親統全師撫甯郡縣以有功
者宜加爵賞遂封協力勤王功臣尋封佐正匡國功
臣加封右僕射仍委之靜海劇鎮府君之屯細柳也
鉏耰荆棘板築城壘不日而就恃其寵不勞於民
卒眾輯睦鎮縣和同商農工賈不改其業親載耒耜

徧植桑麻以備祗奉使臣供承南北十五年內外無
閒言蓋恩威並行緩猛得所矣以寶大元年夏四月
得疾弗興至秋七月二十三日終於靜海鎮之官舍
享年七十有二府君娶汝南周氏隴西彭氏清河張
氏三夫人皆肅雍和鳴內外婉順主喪祭者惟彭氏
張氏居其右焉有子八人長曰從訓耽味雲泉不樂
仕宦侍膳於周氏之側次日智紹在方袍之下次日
元晟節度使正散將爲人溫恭尤尙儒雅娶諸暨鎮
遏使楚牧韓章司徒愛女次日元杲節度正散侍銀
青光祿大夫檢校太子賓客兼監察御史狀貌魁偉

智略出眾識量宏博不拘小節親友間咸曰有父風
娶聞人氏次曰元昇節度下將獷悍好勇真將軍之
器娶鄭氏次曰元寶娶章氏次曰元勝元贊未娶皆
堂堂之軀或親弓馬或閱詩書分掌家事無不幹濟
女三人長適潁川氏西都軍將都知兵馬使明川羅
口使陳師靖僕射之子某先府君逝次適清河氏建
甯都虞候張全尚書之子次適上亭鎮遏使翁錫尚
書之孫節度討擊使上亭鎮遏將元昉之子繼貞弟
三人行存行勤行忠初府君之寢疾也殿下遣中使
三贊宣賜湯藥及啟手足命侍臣持祭奠厚加賻贈

禾志二十四

十五

內外親戚莫不感泣有以見君親之道終始兩全矣
明州郡侯太傅奠贈尤異焉府君世墓在湖州烏程
縣不克歸葬續致桑梓在開元府海鹽縣以其年歲
次甲申十一月乙未朔六日庚子葬於本縣德政鄉
通福里澈墅村之原禮也鶚與府君幸同王事備熟
德美洎有葬日令子元晟元杲泣血而拜請余撰銘
誌堅免不從遂命筆聊紀年代安敢飾詞乃摭實而
爲誌銘曰

挺生英特	邈爾奇形	素蘊豹略	能精武經
戈鋌再舉	氛裊廓清	從茲勇冠	聿播佳聲

盛績旣彰 威名遂振 靜守謙敬 動知逆順
惟此侯王 賞其忠信 不有殊功 那遷劇鎮
匡吳志大 佐越功全 一人注意 百辟惟賢
方務剖竹 宜分重權 孰謂梁木 俄隨逝川
生作忠臣 歿留遺策 眷彼令嗣 恭承帝澤
丹旒斯引 玄宮已闕 萬歲千秋 芳塵永隔

唐彭城劉府君墓誌

貢士潘圖撰

君諱源字文宗先帝王之苗裔也遠祖商漢中書侍郎祖壹唐林泉不仕父興邱園放居君之孟子也周秦之世晉宋以來徙從吳郡海鹽勝邑樹德樹名不

禾志二十四

十六

仕朝廷隱居邱壑嗚呼以開成元年十一月二十五日卒於私第以其年十二月庚寅朔十五日甲辰葬於海鹽縣南三里地號烏夜鄉名海鹽其塋也長松靄日青楓倚天其所也東流滄海西接甘泉南枕秦山之隅北抵武原之地君壽逾七十有二娶河內司徒氏生三子少怵少通少平其子立也雖未閭闔之途有抱皋魚之孝日月逝矣歲不我留勒石記之用存今古其詞曰

野霧蒼蒼 寒郊茫茫 倚歟芳馨 俄遭夜霜

鄉校頌

陸松撰

鄉校縣大夫能教育人材而成之也 維鄉
有校示民有知教始預遜迪於訓彝惟風化是裨
維校在鄉示民有防入孝出悌爲忠爲良斯邦家之
光 鄉校有基如德弗虧劉侯遷之魏侯新之李侯
能成之 其遷者初其新者中肄業傳道有師有宗
繫李侯之功 樂只君子孰後孰先顯有嘉聞於萬
斯年維大夫之賢

鄉校五章章五句

嘉禾志卷第二十四

禾志二十四

十七